



Gobierno dunando reconocimiento n'e Iniciador refineria Coastal Aruba Oscar Wyatt Jr. ta haya caya na su number

Caya Oscar Wyatt Jr., kende na 1991 a habri e refineria Coastal na Aruba, construyendo dos delayed coker unit cu a costa 100 miyon dollar.

Un desaroyo cu a percura cu e refineria a bira un competidor fuerte riba mercado mundial di produccionan refina.

Awe dialuna dia 28 di januari, pa 5'or di atardi ta bay tin un ceremonia pa honra iniciador di refineria Coastal sr. Oscar Wyatt Jr. cu un caya na su number.

E ceremonia ta tuma lugar dilanti di ex-edificio di DIMAS na San Nicolas. E caya cu ta core banda di e muraya di e refineria te Zeewijk ta haya e number

Apertura di Coastal a percura pa 500 cupo di trabou na Aruba e tempo ey. Un persona cu un curashi grandi cu awe ta keda honra cu un caya na su number. Oscar Sherman Wyatt, Jr. a nace na Beaumont, Texas. N'e edad hoben di solamente 16 aña el a haya su licencia pa bula avion. El a atende Texas A & M Univer-

sity, pero a bandona esaki pa drenta servicio militar como un piloto di combate. N'e edad di solamente 21 aña Oscar Wyatt a wordo condecora como un piloto di Segunda Guerra Mundial. Despues di guerra el a sigui studia y a haya su degree den Mechanical Engineering. Na 1950 Wyatt a cuminsa cu e negoshi di energia y a financia e 'Hardly Able Oil Company' e compania cu despues a bira Coastal Oil and Gas Company. Un compania cu a crece y bira grandi danki n'e vision y liderazgo di sr. Oscar Wyatt Jr. Na 1997 sr. Wyatt a retira como chairman di e compania, pero a keda como Chairman Ejecutivo te na januari di 2001 ora a bende Coastal cu El Paso Natural Gas Company. Na juli 2001 Oscar Wyatt Jr. a

start un compania nobo 'the NuCoastal Corporation'.

Oscar Wyatt Jr. semper tabatin atencion pa hende y nan bienestar y ta dedica tambe na yuda den avance di investigacionnan biomedico. Semper su pasion pa bula a keda y awor e ta den e Board of Stewards di Texas Aviation Hall of Fame.

Oscar Wyatt y su casa Lynn ta hendenan masha generoso y a duna hopi na institucionnan caritativo rond mundo, incluyendo Mediconan sin Frontera, Princess Grace Foundation, Houston Grand Opera, Houston Ballet, Star of Hope Mission, Methodist Hospital, M. D. Anderson Hospital y St. Luke's Hospital. Sr. Oscar Wyatt Jr. y su señora Lynn tin 4 yiu homber y dos nieto.

Henter Aruba ta keda invita pa

atende e ceremonia awe tardi banda di ex edificio di DIMAS na San Nicolas. Un persona cu danki na su curashi y liderazgo a percura pa un desaroyo positivo pa Aruba y su hendenan. Di e forma aki, Gabinete Mike Eman ta duna reconocimiento na Oscar Wyatt Jr. kende a habri e refineria di Lago bek, despues cu e plannan tabata pa desmantel'e. Un pregunta a keda: Cu e hecho aki nifica cu drs. Mervin Wyatt Ras, a keda acepta como candidato riba proximo lista di AVP? Awe tardi, e por contesta e pregunta aki. Y kico MEP mes ta pensa, siendo cu Oscar Wyatt Jr. ta y ta te ainda un di e patronisadornan grandi di MEP y tin hasta como su oficina di abogado, Hendrik Croes y socionan.